

食貨典第一百二十九卷

賦役部彙考十九

明一

明代稅糧總數

按弇州四部稿大明輿地東起朝鮮西至嘉峪南濱海北連沙漠南北直隸府三

十三州四十縣二百一十承宣布政司十三屬府一百一十八羈縻一十九州一百五十三羈縻四

十七縣九百二十八羈縻六總爲府一百五十九州二百三十四縣一千二百一十四宣慰司一十

一宣撫司一十一安撫司二十二招討司一百長官司一百六十九蠻夷長官司五除夷戶外實計

里六萬九千五百五十六戶九百三十五萬二千零一十五口五千八百五十五萬八百零一夏秋

二稅共米麥二千六百零八萬五千九百一十六石京通二倉臨德淮漕四倉每年漕運米四百萬

石絹二十萬五千五百九十八疋絲一萬七千零三斤又三百一十六萬八千一十七兩棉花二十

四萬六千五百六十三斤綿布一十三萬八百七十疋麻布二千七十七疋洞蠻席布二百五十九

條芋六十五斤鈔八萬一千二十五錠零一百八十四貫馬草一千四百六十九萬五千九百九十

一包又一千一百一十六萬二千六百四十三斤歲辦鹽一百一十七萬六千五百二十五引又鹽價并引價銀四萬六千一百五十八兩太倉庫歲額運銀一百四十九萬兩內夏稅五萬五百餘兩秋糧九十四萬四千八百餘兩馬草折銀二十三萬七千餘兩鹽課折銀二十餘萬兩雲南開辦三萬餘兩馬驢驛疋二十萬一千一百長淮以北中原之地及三楚田蕪而不墾卽墾者匿畝而不報浙東江右閩廣之地糧太輕而獨取重於蘇松嘉湖常之五郡而已茶酒市稅房租之利不能如唐宋之講求而備邊宗藩之費什伯之此帑藏之所以日匱也

按圖書編本朝田土戶口稅糧

課程錢鈔十三布政司并直隸府州實在田土計三百二十二萬八千五十八頃九十二畝零十三布政司并直隸府州人戶總計一千六十五萬二千八百七十戶人口總計六千五十四萬五千八百二十一口十三布政司并直隸府州夏稅秋糧總數諸司職夏稅米麥四百七十一萬二千九百石錢鈔三萬九千八百錠絹三十八萬八千四百八十七疋秋糧米二千四百七十三萬四百五十石錢鈔五千七百三十錠絹五十九疋各布政司并直隸府州課程錢鈔并金銀布帛等項折收總計三百六十三萬七百七十八錠有零外有各處土產茶鹽硝礬朱砂水銀等物雖有定額數目繁

碎難以備載

太祖吳元年詔免太平諸郡租賦 按江南通志太祖丁未吳元年二月免租賦詔予嘗親歷田野見人民凋散土地荒蕪失業者多蓋因久困兵革生息未遂譬之觸熱者思得清涼冒寒者思就溫燠爲人上者固當念之且如太平諸郡乃吾渡江開創之地供億先勞之民其有租賦宜與量免少甦民力

洪武 年始造黃冊 按明會典洪武初令凡民間賦稅自有常額諸人不得於諸王駙馬功勳大臣及各衙門妄獻田土山場窖冶遺害於民違者治罪 又按會典洪武初定凡各處造到黃冊每年終後湖管冊主事將查過黃冊起數造冊進繳 凡各處軍民戶籍不明解人前來挨查後湖黃冊不許將槩府州縣全抄止許查本戶糧田軍民丁產來歷明白卽便發回亦不許因而帶抄別戶以泄事機 按續文獻通考大明令云凡典賣田土過割稅糧各州縣置簿附寫正官提調收掌

隨卽推收年終通行造冊解府毋令產去稅存與民爲害大誥云應天宣城太平廣德鎮江五府州爲是興王之地久被差徭特將夏秋稅糧不時全免惟元宋入官田地我朝籍沒之田民田全免官

田若令全免民難消受所以減半徵收洪武初令官田起科每畝五升三合五勺民田每畝三升三合五勺重租田每畝八升五合五勺蘆地每畝五合三勺四抄草場地每畝三合一勺沒官田每畝一斗二升又令各處人民先因兵燹遺下田土他人開墾成熟者聽爲己業業主已還有司於附近荒田撥補又令各處荒閒田地許諸人開墾永爲己業俱免雜泛差科三年後並依民田起科稅糧洪武元年初定賦役之制免稅糧差役 按明會典凡課種國初令天下農民凡有田五畝至十畝者栽桑麻木棉各半畝十畝以上者倍之田多者以是爲差有司親臨督視惰者有罰不種桑者使出絹一疋不種麻者使出麻布一疋不種木棉者使出棉布一疋洪武元年奏准桑麻科徵之額麻每畝八兩木棉每畝四兩栽桑者四年以後有成始徵其租 又按會典凡蠲免折徵洪武元年令水旱去處不拘時限從實踏勘實災稅糧卽與蠲免 凡優免差役洪武元年詔民年七十以上者許一丁侍養免雜泛差役 按續文獻通考元年定役法每田一頃出丁夫一人 按明外史

楊思義傳太祖稱吳王授起居注初錢穀隸中書省吳元年設始司農卿以思義爲之明年建元洪武設六部改爲戶部尙書帝諭思義曰先王之世無不耕之民不蠶之女自什一制湮技巧作而農

桑廢一民負耒百家待食一女理織百夫待衣欲民不貧何可得也思義請令民間皆植桑麻四年始徵其稅不種桑者輸絹不種麻者輸布如周官里布法詔可

洪武二年令民八十以上免役又詔免江左北平諸郡二稅 按明會典二年令凡民年八十以上止有一子若係有田產應當差役者許令雇人代替出官無田產者許存侍丁與免雜役 按江南通志二年詔曰朕本布衣率眾渡江首定太平次居建業肇興丕基其鎮江太平寧國廣德爲京師之翼郡創業之初興師旅定羣雄軍需錢糧供億浩繁止此數郡以足我用子孫百世何忘江左之民朕欲數郡之民次第甦息故先太平次應天鎮江俱已蠲免稅糧一年令洪武二年夏秋二稅應天太平鎮江再與蠲免其寧國廣德及滁和無爲等州亦與蠲免以甦吾民稱朕意焉 按宣府鎮志二年詔近者燕都旣平土地疆宇盡爲國家所有其民久被兵殘困于徵斂尤甚齊魯之民其北平等處新附地面可將洪武二年稅糧亦與蠲免一年有司更加存恤以副朕懷又詔北平新附地面凡有逋欠官錢者俱係前代事理並行革撥

洪武三年許軍民未占籍而不應役者自首又定徵收草料及兩江供役之制免節婦及北方府縣

荒地差稅 按明會典國初因賦定役每十年大造黃冊戶分上中下三等差役照冊僉定迨法久弊生歷朝每有釐正更創如銀差力差聽差十段錦一條鞭及南北派田之異其例略見凡審編賦役洪武三年令各處軍民凡有未占籍而不應役者許自首 又按會典凡征收草料洪武三年令應天寧國等六府近京師者重租田一頃輪草十六束輕租田加倍池州安慶等十六府遠京師者輪刈草重租田一頃十八包包各十五觔輕租田加倍 又定凡民間寡婦三十以前夫亡守志至五十以後不改節者旌表門閭除免本家差役 按續文獻通考三年置直隸應天等十八府州及江西九江饒州南康三府均工夫圖冊每歲農隙其夫赴京供役每歲率用三十日遣歸田多丁少者以佃人充夫其佃戶出米一石資其費用非佃人而計畝出夫者其資費每田一畝出米二升五合 又按續通考三年令以北方府縣近城荒地召人開墾每戶十五畝又給地二畝種菜有餘力者不限頃畝皆免三年租稅

洪武四年勸諭農民種植計畝科稅免闕里孔氏及各府縣軍戶徭役又設糧長徵收稅糧 按明會典四年令各府州縣行移提調官常用心勸諭農民趁時種植仍將種過桑麻等項田畝計科絲

綿等項分豁舊有新收數目開報 又按會典四年令免關里孔氏子孫二十六戶徭役又令各府縣軍戶以田三頃爲率稅糧之外悉免雜役餘田與民同役 又令天下有司度民田以萬石爲率設糧長一名專督其鄉賦稅奏准浙江行省歲輸糧九十三萬三千二百六十八石設糧長一百三十四名

洪武六年令蘇松等府糧長以下設運納人員 按明會典六年令蘇松等府糧長每名設知數一名斗級二十名送糧人夫一千名以備運納

洪武七年詔減蘇松嘉湖等府田租又定軍官免役之制 按明會典凡科則陞降洪武初令官田起科每畝五升三合五勺民田每畝三升三合五勺重租田每畝八升五合五勺蘆地每畝五合三勺四抄草場地每畝三合一勺沒官田每畝一斗二升七年詔蘇松嘉湖等府田如每畝起科七斗五升者減半 又按會典七年令山東正軍全免差役貼軍免百畝以下餘田與民同役又令官員亡故者免其家徭役三年

洪武九年詔復歲租 按宣府鎮志九年詔曰朕於今年三月內勅下戶部使之度出幾何量入幾

何對云官軍足食可三二年於是詔令各省府悉將本年民間夏稅秋糧盡行蠲免其北平省所屬地方已免洪武八年夏稅其洪武九年夏稅秋糧亦照各省府並行蠲免應有入官田地私租不在蠲免之例

洪武十二年免北平稅糧 按宣府鎮志十二年詔曰北平所屬地方天久不雨朕思爲民立燕藩屏中國保障吾民命工肇造宮殿軍民共成何期有司差役不均有傷和氣致令民艱種樹除將布政司薛祥等見行取問其北平所屬地方洪武十二年夏稅秋糧盡行蠲免

洪武十三年減糧額免租徭又命編造圖冊 按明會典十三年令減蘇松嘉湖四府重租糧額舊額田畝科七斗五升至四斗四升者減十之二四斗三升至三斗六升者減十之一俱止徵三斗五升以下仍舊 又按會典十三年令各處荒閒田地許諸人開墾永爲己業俱免雜泛差徭三年後並依民田起科又詔陝西河南山東北平等布政司及鳳陽淮安揚州廬州等府民間田土許儘力開墾有司毋得起科 又令六部都察院應天府并兩縣判祿司儀禮司行人司隨朝官員除本戶合納稅糧外其餘一應雜泛差役盡免又各處功臣之家戶有田土除合納糧草夫役其餘糧長里

長水馬驛夫盡免鳳陽揚州二府及和州民畜養馬一匹者免二丁

按聖君初政記上問戶部

天下民孰富對曰以田賦較之惟浙江多富室若蘇州一郡民歲輸糧百石至四百石者四百九十戶五百石至千石者五十六戶千石至二千石者六戶二千石至三千八百石者二戶計五百四十戶而歲輸至五十萬有奇上曰富民多豪強故民受其害宜召之來朕時勉諭之于是諸郡富民入見諭之云云皆頓首謝復賜酒食遣之十三年戶部覈實天下土田惟兩浙富民畏避徭役往往以田產詭託親鄰佃僕謂之貼腳詭久之相習成風奸弊百出謂之通天詭上聞之遣國子生武淳等往各處查定細底編類爲冊其法甚備謂之魚鱗圖冊

按續文獻通考庚申春三月減蘇州

松江嘉興湖州四府稅額先是張士誠竊據其地而蘇州尤稱富庶徐達常遇春等統精兵二十萬攻之數年始下太祖怒其附寇持城不降乃取諸豪族租簿俾有司加稅故蘇賦特重而松江嘉湖次之蓋以徵一時云至是命戶部裁其額凡一畝科七斗五升至四斗四升者減十之二四斗三升至三斗六升者俱止徵三斗五升其以下仍舊

按明外史楊思義傳范敏洪武十三年命署尚

書事未幾卽授試尚書帝以徭役不均命編造黃冊敏議百一十戶爲里丁多者十人爲里長鳩一

里之事以供歲役十年一周餘百戶爲十甲後遂仍其制不廢 按宣府鎮志十三年復天下歲租
洪武十四年詔天下編賦役黃冊 按明會典凡攢造黃冊十四年詔天下府州縣編賦役黃冊以
一百一十戶爲里推丁多者十人爲長餘百戶爲十甲甲凡十人歲役里長一人管攝一里之事城
中曰坊近城曰廂鄉都曰里凡十年一周先後則各以丁數多寡爲次每里編爲一冊冊首總爲一
圖鰥寡孤獨不任役者則帶管於百一十戶之外而列於圖後名曰畸零冊成一本進戶部布政司
及府州縣各存一本

洪武十五年革罷糧長徵收糧令照黃冊里甲人等催辦 按明會典云云

洪武十六年令鳳陽臨淮二縣民免雜泛差役 按明會典云云

洪武十七年令各處賦役必驗丁糧多寡產業厚薄以均其力違者罪之 按明會典云云

洪武十八年令有司第民戶上中下三等爲賦役冊定科折稅糧數額又令復設糧長禁灑派等事

按明會典十八年令有司第民戶上中下三等爲賦役冊貯於廳事凡遇徭役取驗以革更弊 又
按會典十八年令兩浙及京畿官田凡折收稅糧鈔每五貫准米一石絹每疋准米一石二斗金每

兩淮米十石銀每兩淮米二石綿布每疋淮米一石苧布每疋淮米七斗夏稅農桑絲每十八兩淮絹一疋重十六兩又令各該有司復設糧長以民戶丁糧稍多者充當 又令將自己田地移坵換段詭寄他人及灑派等項事發到官全家抄沒若不如是靠損小民 又議農桑起科太重百姓艱難令今後以定數爲額聽從種植不必起科

洪武十九年令各處糧長暫于南京戶部宣諭給與勘合後遂爲例 按續文獻通考云云

洪武二十年造魚鱗冊成 按續文獻通考丁卯冬十二月魚鱗冊成初太祖既定天下遂覆實天下土田造成冊籍旣而兩浙及蘇州等府富民畏避差役往往以田產零星花附于親鄰佃僕之戶名爲貼腳詭寄久之相習成風鄉里欺州縣欺府奸弊百出名爲通天詭寄而富者益富貧者益貧矣太祖廉知之遂召國子生武淳等往各處隨其稅糧多寡分爲幾區區定糧長四人乃集糧長暨耆民躬復田畝以量度之遂圖其田形之方圓大小次書其主名及田之四至編彙爲冊號曰魚鱗冊至是冊成以進百弊始絕

洪武二十一年令稅課局取市民殷實戶巡欄免耕閒曠地民賦役 按續文獻通考二十一年令

稅課司局巡欄止取市民殷實戶應當不許僉點農民 又按續通考二十一年遷山西澤潞二州民之無田者往彰德真定臨清歸德太康諸閒曠之地令自耕種免其賦役三年

洪武二十二年命杭湖諸郡民就耕淮沔等處免賦役三年 按續文獻通考二十二年夏四月命杭湖溫台蘇松諸郡民無田許令往淮沔南滁和等處就耕官給鈔戶三十錠使備農具免其賦役三年

洪武二十三年令官田每頃草料七包半民田加倍俱起運赴京定場交納 按明會典云云

洪武二十四年奏准攢造黃冊格式 按明會典二十四年奏准攢造黃冊格式有司先將一戶定式謄刻印板給與坊長廂長里長并各甲首令人戶自將本戶人丁事產依式開寫付該管甲首其甲首將本戶并十戶造到文冊送各該坊廂里長坊廂里長各將甲首所造文冊攢造一處送赴本縣本縣官吏將冊比照先次原造黃冊查算如人口有增卽爲作數其田地等項買者從其增添賣者准令過割務不失原額排年里長仍照黃冊內原定人戶應當設有消乏許於一百戶內選丁糧近上者補充圖內有事故戶絕者於畸零內補轉如無畸零方許於鄰圖人戶內撥補其上中下三

等戶亦照原定編排不許更改果有消乏事故有司驗其丁產從公定奪仍於各文冊前面本縣照依式樣類總填圖所在有司官吏里甲敢有團局造冊科斂害民或將各處寫到如式無差文冊故行改抹刁蹬不收者許老人指實連冊綁縛害民吏典赴京具奏犯人處斬若頑民故誣排陷者抵罪若官吏里甲通同人戶隱瞞作弊及將原報在官田地不行明白推收過割一槩影射減除糧額者一體處死隱瞞人戶家長處死人口遷發化外 凡編排里長務不出本都且如一都有六百戶將五百五十戶編爲五里剩下五十戶分派本都附各里長名下帶管當差不許將別都人口補換其畸零人戶許將年老殘疾并幼小十歲以下及寡婦外郡寄莊人戶編排若十歲以上者編入正管且如編在先次十歲者今已該二十歲其十歲以上者各將年分遠近編排候長一體充當甲首其有全種官田人戶亦編入圖內輪當 凡冊式內定到田地山塘房屋車船各項款目所在官司有者依式開寫無者不許虛開若類縣總都總收除項下止許開寫人丁事產總數不必備開花戶其州縣將各里文冊類總填圖完備仍依定式將各里人丁事產攢造一處另造類冊一本於內分豁各鄉都人丁事產總數正官首領官吏躬親磨算查對相同於各里并本州縣總冊後書名畫

字用印解赴本府其提調正官首領官吏於各州縣造到文冊躬親檢閱磨算相同本府依定式另造總冊一本於內分豁各州縣人丁事產總數并州縣造到各項冊後一體開寫年月書名書字用印直隸府州本府委官一員率各州縣提調造冊官吏親齎其布政司所轄府州仍申解布政司本司官吏躬親檢閱磨算相同依式類造總冊一本於內分豁各府州人丁事產總數於各府州造到總冊後填寫年月書名書字用印委官一員率各府州縣官吏親齎俱限年終進呈 凡菴觀寺院已給度牒僧道如有田糧者編入黃冊與里甲納糧當差於戶下開寫一戶某寺院菴觀某僧某道當幾年里長甲首無田糧者編入帶管畸零下作數 凡黃冊字樣皆細書大小行款高低照坐去式樣面上鄉都保分等項照式刊印不許用紙浮貼其名州縣每里造冊二本進呈冊用黃紙面布政司府州縣冊用青紙面 又按會典二十四年奏准凡雲南各府攢造黃冊除流官及土官馴熟府分依式攢造外其土官用事邊遠頑野之處里甲不拘定式聽從實編造貴州宣慰司不造播州宣慰司附近通漢語者編造其餘夷民不造 又令各處布政司及直隸府州縣并各土官衙門所造黃冊俱送戶部轉送後湖收架委監察御史二員戶科給事中一員戶部主事四員監生一千二

百名以舊冊比對清查如有戶口田糧埋沒差錯等項造冊徑奏取旨其官員監生合用飲饌器皿等項并膳夫俱於國子監取用如不敷於都稅司并上元江寧縣衙門支撥紙劄於刑部都察院關領不敷之數并筆墨於應天府支給官錢買辦查冊房屋冊架過湖船及桌凳什物俱工部等衙門添撥夫匠修造官員監生吏卒人匠等每五日一次過湖曬晾司禮監戶部收掌鎖鑰並不許一應諸人往來 又令應天太平寧國鎮江廣德五處官田稅糧自後減半徵收 按續文獻通考二十四年令寄莊人戶除里甲原籍排定應役其雜泛差役皆隨田糧應當

洪武二十六年定天下夏稅秋糧差役之式 按明會典二十六年各布政司并直隸府州實徵夏稅秋糧總數 夏稅米麥四百七十一萬二千九百石錢鈔三萬九千八百錠絹二十八萬八千

四百八十七疋

秋糧米二千四百七十二萬九千四百五十石錢鈔五千七百三十錠絹五十

九疋

浙江布政司夏稅米八萬五千五百二十石錢鈔二萬六百九十錠絹一十三萬九千一

百四十疋秋糧米二百六十六萬七千二百七石錢鈔八十六錠絹五十九疋

北平布政司夏

稅麥三十五萬三千二百八十石絹三萬二千九百六十二疋秋糧米八十一萬七千二百四十石

江西布政司夏稅米七萬九千五十石錢鈔六千四百五錠絹一萬五千四百七十七疋秋糧米二百五十八萬五千二百五十六石 湖廣布政司夏稅米麥一十二萬八千七百六十六石絹二

萬六千四百七十八疋秋糧米二百三十二萬三千六百七十石 福建布政司夏稅麥六百六

十五石錢鈔一萬二千七百五錠絹二百七十三疋秋糧米九十七萬七千四百二十石 山東

布政司夏稅麥七十七萬三千二百九十七石絹二萬三千九百三十二疋秋糧米一百八十萬五千六百二十石 山西布政司夏稅麥七十萬七千三百六十七石秋糧米二百九萬三千五百

七十石 河南布政司夏稅麥五十五萬六千五百九十九石絹一萬七千二百二十六疋秋糧米一

百六十四萬二千八百五十石 陝西布政司夏稅麥六十七萬六千九百八十六石秋糧米一

百二十三萬六千一百七十八石 四川布政司夏稅麥三十二萬五千五百五十石秋糧米七

十四萬一千二百七十八石 廣東布政司夏稅麥五千三百二十石秋糧米一百四萬四千七

十八石 廣西布政司夏稅麥一千八百六十九石秋糧米四十九萬二千三百五十五石

雲南布政司夏稅麥一萬八千七百三十石秋糧米五萬八千三百四十九石 應天府夏稅麥